



საპენსიო სისტემის რეფორმა: არსი და მნიშვნელობა საქართველოსთვის

მზევინარ ნოზაძე

ეკონომიკის აკადემიური დოქტორი
სტუ ასოც. პროფესორი

შესავალი

ნებისმიერი ქვეყნის მთავრობის მიერ განხორციელებულ ეკონომიკურ რეფორმებსა და სოციალურ პროგრამებში ერთ-ერთ მნიშვნელოვან ადგილს იკავებს საპენსიო სისტემის რეფორმა. ეს კი დაკავშირებულია იმ როლთან, რომელსაც ასრულებს საპენსიო სისტემა ქვეყნის ფინანსურ და სოციალურ სფეროში.

ზოგადად, საპენსიო სისტემა მოიცავს სახელმწიფო საპენსიო სისტემას და არასახელმწიფო საპენსიო სისტემას. **სახელმწიფო საპენსიო სისტემის** მოქმედების ძირითადი პრინციპი დამყარებულია იმაზე, რომ დასაქმებული ადამიანები ამა თუ იმ ფორმით (ძირითადად ეს სოციალური გადასახადის სახით) იხდიან გადასახადს, რომლის აკუმულირებაც ხდება სახელმწიფო საპენსიო ფონდში, ხოლო ამ საპენსიო ფონდიდან პენსიები საპენსიო ასაკს მიღწეულ მოქალაქეებზე ნაწილდება. როგორც წესი, განაწილება ხდება დაახლოებით თანაბრად და პენსიის დანიშვნისას მცირე მნიშვნელობა ენიჭება საპენსიო ფონდში მოქალაქეთა შენატანების სიდიდეს.

არასახელმწიფო საპენსიო სისტემაში მოქმედებს დაგროვების პრინციპი. საპენსიო ფონდის მონაწილე მთელი შრომითი საქმიანობის პერიოდში აკეთებს შენატანებს საკუთარ საპენსიო ანგარიშზე. მისი პენსიის ოდენობა საპენსიო ასაკის მიღწევისას დაგროვილი თანხის ოდენობით განისაზღვრება.

საკვანძო სიტყვები: პენსია, დაზღვევა, შენატანი, საპენსიო უზრუნველყოფა, საპენსიო სისტემა, საპენსიო ფონდი, ეკონომიკური რეფორმა, სოციალური პროგრამები, სოციალური მომსახურება, სახელმწიფო პენსია.

ძირითადი ტექსტი

საპენსიო სისტემის რეფორმა, მნიშვნელოვან როლს ასრულებს ქვეყნის სოციალურ, ეკონომიკურ და პოლიტიკურ ცხოვრებაში.

განვითარებად ქვეყნების საპენსიო სისტემაში კერძოსთან შედარებით უპირატესი ადგილი **სახელმწიფო საპენსიო სისტემას** უკავია, განსაკუთრებით კი ყოფილ სოციალისტურ ქვეყნებში. თუმცა, ამ სისტემას მნიშვნელოვანი ნაკლოვანებები გააჩნია:

ა) სახელმწიფო საპენსიო სისტემა მძიმე ტვირთია ბიუჯეტისათვის, რადგანაც ნებისმიერი ქვეყნის სოციალური პროგრამების და, მათ შორის, პენსიების უზრუნველყოფა ხდება ძირითადად სახელმწიფო ბიუჯეტიდან. ეს ეხება არა მხოლოდ განვითარებად ქვეყნებს. ევროპის ქვეყნებში განუხრელად იზრდება საპენსიო ასაკს მიღწეულ მოქალაქეთა წილი ქვეყნის მოსახლეობაში. შესაბამისად იცვლება დასაქმებულთა და პენსიონერთა თანაფარდობა. ითვლება, რომ ასეთი საპენსიო სისტემის ნორმალური ფუნქციონირება აწყდება სიძნელეებს, თუ ერთ პენსიონერზე მოდის სამ დასაქმებულზე ნაკლები;

ბ) დადგენილია, რომ თუ ავიღებდით იმ თანხას, რომელსაც გადაიხდის საშუალო შემოსავლის მოქალაქე საპენსიო ასაკის მიღწევამდე და მოვახდენდით მის ინვესტირებას გარკვეული შემოსავლიანობით, საპენსიო ასაკის მიღწევისას ამ მოქალაქეს ექნებოდა დაგროვილი კაპიტალის მეტი ოდენობა, ვიდრე კუთვნილი პენსია. ეს სამართლიანია ევროპის თითქმის ყველა ქვეყნისათვის, მათ შორის, ისეთებისათვისაც, სადაც მაღალია პენსიის დონე.

გ) დასაქმებულთა თანაფარდობის შემცირება პენსიონერთა რიცხვთან იწვევს საგადასახადო განაკვეთების (ძირითადად

სოციალური გადასახადების) ზრდას დასაქმებულებზე და განსაკუთრებით ბიზნესზე, რაც უარყოფითად მოქმედებს ბიზნეს-გარემოზე და ეკონომიკის განვითარებაზე.

როგორც უკვე ჩვენთვის ცნობილია, გარდა სახელმწიფო საპენსიო სისტემისა, ბევრ ქვეყანაში არსებობს აგრეთვე არასახელმწიფო (კერძო) საპენსიო სისტემა. ქვეყნის მაგალითი, სადაც პარალელურად არის სახელმწიფო და არასახელმწიფო საპენსიო სისტემა, არის ამერიკის შეერთებული შტატები, სადაც სხვადასხვა ტიპის საპენსიო ფონდი და პროგრამები ქვეყნის ფინანსების 25%-ს აკონტროლებენ. შეერთებული შტატების შემთხვევაში ასეთი სისტემა ძირითადად მოქმედებს დამაკმაყოფილებლად, თუმცა მასაც აქვს გარკვეული ნაკლოვანებები:

ა) არასახელმწიფო საპენსიო სისტემა ატარებს ნებაყოფლობით ხასიათს, ამიტომ ბევრი დასაქმებული მოქალაქე, დაბალი შემოსავლებისა თუ წინდაუხედაობის მიზეზით საპენსიო ასაკს ყოველგვარი დანაზოგის გარეშე ხვდება. მათი სიბერის უზრუნველყოფისათვის საჭირო ხდება სხვადასხვა სოციალური პროგრამების შემუშავება, რაც დამატებითი დატვირთვაა ბიუჯეტისთვის.

ბ) საპენსიო ფონდებისა და სქემების შექმნა ძალიან ადვილია, ხოლო მათი საქმიანობის რეგულირება საკმაოდ გართულებულია ამ ფონდების სიმრავლის გამო. თუმცა ეს ნაკლოვანება მცირე ხარისხით აისახება ძლიერი ეკონომიკის მქონე ქვეყნებზე, რადგანაც ამ ქვეყნებში კერძო საპენსიო სისტემის გამართულად ფუნქციონირებას ხელს უწყობს ძლიერი საფინანსო-საბიუჯეტო სისტემის და შესაბამისი საკანონმდებლო ბაზის არსებობა.

განასხვავებენ **საპენსიო უზრუნველყოფის სამი ძირითად მოდელს:**

- 1) საპენსიო უზრუნველყოფის სოლიდარულ პრინციპზე დამყარებული მოდელი.
- 2) საპენსიო უზრუნველყოფის დაგროვებით პრინციპზე დამყარებული მოდელი.

3) საპენსიო უზრუნველყოფის შერეულ პრინციპზე დამყარებული მოდელი.

პირველი მოდელის მოქმედების პირობებში საპენსიო თანხების აკუმულაცია წარმოებს დასაქმებული მოქალაქეების ხელფასებიდან მობილიზებული გადასახდელების (გადასახადები, სადაზღვევო შენატანები) მეშვეობით. ამ მოდელის შესაბამისად, სახელმწიფო პირდაპირ აფინანსებს საპენსიო გასაცემლებს სახელმწიფო ბიუჯეტიდან.

ინფლაციის და ეკონომიკური ზრდის პირობებში, როგორც წესი, იზრდება შრომის ანაზღაურების და, შესაბამისად, საპენსიო ანარიცხების ოდენობაც. პენსიების ინდექსაცია კი ტრადიციულად დასაქმებული მოქალაქეების ჯამურად გადახდილი თანხის ზრდის ხარჯზე ხდება. თუმცა, ამ მოდელს მნიშვნელოვანი რისკები ახლავს თან. უპირველესად ის, რომ მოსახლეობის დაბერების კვალობაზე მნიშვნელოვნად იცვლება შრომისუნარიანებისა და პენსიონერების თანაფარდობა. შედეგად, თუკი მცირდება დასაქმებულების რიცხვი პენსიონერების რიცხვთან მიმართებაში, ეს ნეგატიურად აისახება პენსიების ინდექსაციაზე, რაც პენსიების კლების წინაპირობაა.

მეორე მოდელი გულისხმობს პენსიის დაგროვების ინდივიდუალურ ხასიათს, პენსიის სიდიდე კი დამოკიდებულია საპენსიო შენატანის სიდიდეზე, შენატანების ვადიანობაზე და საპენსიო ფონდების მიერ განხორციელებულ საინვესტიციო პოლიტიკასა და ფინანსურ მაჩვენებლებზე. დაგროვებით მოდელი იმ შემთხვევაშია მისაღები და ეფექტიანი, როცა დაბანდებაებიდან მიღებული სარგებელი აღემატება ინფლაციისა და პენსიების ზრდას.

ხოლო მესამე მოდელი გულისხმობს გარკვეული ელემენტების შეჯერებას როგორც სოლიდარული, ასევე დაგროვებითი საპენსიო სქემების მოდელებიდან. ამგვარი მიდგომა ნაწილობრივ ამცირებს რისკებს და ზრდის მოქნილობას საპენსიო უზრუნველყოფაში სახელმწიფო და კერძო სექტორების მონაწილეობის მოცულობის განსაზღვრისას.

ამ სამ პრინციპთაგან ერთ-ერთზე დაფუძნებით მსოფლიოს

ბევრ ქვეყანაში სხვა და სხვა ტიპის საპენსიო უზრუნველყოფის სისტემები ფუნქციონირებს. განვიხილოთ ზოგიერთი მათგანი:

ამერიკის მოდელი. როგორც უკვე აღვნიშნეთ, ამ ქვეყანაში ერთდროულად მოქმედებს სახელმწიფო და კერძო საპენსიო სქემები. აქედან სოლიდარული განაწილებითი სისტემა სტანდარტულ ფორმულას ეფუძნება. პენსიონერები იღებენ შრომისუნარიანი მოსახლეობის მიერ შესაბამის ფონდებში გადახდილ ფულს. უკანასკნელი გათვლებით, საპენსიო გადასახადის განაკვეთი შეადგენს, საშუალოდ, 10,7%-ს და წესისამებრ თანაბრად იხდება კომპანიის და დაქირავებული თანამშრომლის მიერ. დაგროვებითი სისტემა კი კერძო საპენსიო ფონდების საინვესტიციო სტრატეგიას ეფუძნება. საპენსიო რეზერვები ინვესტირდება ფასიან ქაღალდებში და საკრედიტო დაწესებულებებში.

არასახელმწიფო სექტორში დასაქმებულები აგროვებენ დამატებით პენსიას არასახელმწიფო ფონდებში, რომლებიც ყველაზე ხშირად იქმნება სამუშაო ადგილის მიხედვით. გარდა ამისა, ნებისმიერ ამერიკელს აქვს საშუალება, გახსნას საკუთარი საპენსიო ანგარიში ნებისმიერ საპენსიო ფონდში და შეიქმნას დამატებითი შემოსავლის წყარო სიბერის უზრუნველსაყოფად.

ამდენად, ამერიკელები უზრუნველყოფენ სამი ტიპის პენსიას: სახელმწიფოს, შრომითი ურთიერთობიდან გამომდინარეს (კორპორაციულს) და ინდივიდუალურს.

საგულისხმოა, რომ მსგავსი მოდელი მოქმედებს ასევე ლათინური ამერიკის ზოგიერთ ქვეყანაში და ევროპაშიც (მაგალითად, პორტუგალიაში).

ევროპული მოდელი. ეს სისტემა უპირატესად ეფუძნება სამდონიან გერმანულ მოდელს, აერთიანებს რამდენიმე განსხვავებულ სისტემას და დონეების მიხედვით განსხვავდება დაზღვეულთა ოდენობით, დაფინანსების პრინციპებით და დაცულობის ხარისხით.

პირველი დონე აერთიანებს პენსიებს, რომლებიც აუცილებელია მოსახლეობის გარკვეული ჯგუფებისთვის (მოსამსახუ-

რეები, სახელმწიფო მოხელეები, ფერმერები, ექიმები, ადვოკატები, ნოტარიუსები და ა.შ.) პირველი დონე გულისხმობს როგორც წესი სოლიდარულ პრინციპებზე დამყარებულ სახელმწიფო საპენსიო სისტემას და ეს არის ან საბაზისო ან მინიმალური პენსიის გარანტირება.

მეორე დონეს უზრუნველყოფს საპენსიო გადასახდელები, რომელსაც იხდის დაქირავებული ნებაყოფლობით საფუძველზე, დამქირავებლის ინიციატივით. მეორე დონე როგორც წესი წარმოადგენს სავალდებულო ან ნებაყოფლობით კორპორაციულ საპენსიო სქემებს (სადაც დამსაქმებელის ვალდებულებებია განსაზღვრული) - ეს არის დამატებითი პენსია, რომელიც ფაქტიურად სავალდებულოა და საკუთარ ან დასაქმებულის სასარგებლოდ განხორციელებულ შენატანებზე დამოკიდებული

მესამე დონეს წარმოადგენს ნებაყოფლობითი ინდივიდუალური დაგროვებები და ინვესტიციები საფინანსო ინსტიტუტებში.

აღსანიშნავია, რომ ევროპის ქვეყნების საპენსიო სისტემებში საპენსიო დაზღვევის აუცილებლობა განსაზღვრულია კანონით. სტატისტიკურად, უფრო დიდი წილი მოდის განაწილებით მექანიზმზე.

პენსიის ოდენობა ინდივიდუალურია ყველა დაზღვეულისთვის და დამოკიდებულია ხელფასის ოდენობასა და სისტემაში დაზღვეულად ყოფნის ხანგრძლივობაზე. ამავე დროს, პერიოდულად ხდება დაგროვებითი თანხების ინდექსაცია.

სხვადასხვა ქვეყნების საპენსიო მოდელებზე და მათ ეფექტიანობაზე გავლენას ახდენს ისეთი ფაქტორები, როგორიცაა: დედამიწის მოსახლეობის მატება და დაბერება, სიცოცხლის საშუალო ხანგრძლივობა, თანაფარდობის ცვლილება მოსახლეობის შრომისუნარიან მოქალაქეებსა და პენსიონერებს შორის.

World Population Aging 2009-ის კვლევის მიხედვით, თუ 2009 წელს 60 წლის და უფროსი ასაკის ადამიანების რაოდენობა დედამიწის მთლიან მოსახლეობაში 11%-ის დონეზე იყო, 2050

წლისთვის მისი 22%-მდე ზრდა არის მოსალოდნელი. 2050 წლისთვის 60 წლის და უფროსი ასაკის ადამიანების რაოდენობა მსოფლიოში 2 მილიარდს გადააჭარბებს.¹

აქედან გამომდინარე, მოსახლეობის დაბერება და დასაქმებულთა რიცხოვნობის შემცირება პენსიონერებთან შედარებით დაკავშირებული იქნება სახელმწიფო ბიუჯეტიდან მეტი საპენსიო თანხების გაცემასთან, რაც უფრო მეტად გაზრდის დეფიციტს წინასწარი გადახდის (Pay As-You-Go) საპენსიო სქემებში.

რაც შეეხება საქართველოს საპენსიო სისტემას, იგი მოიცავს სახელმწიფო საპენსიო სისტემას და კერძო საპენსიო სისტემას, რომლის როლი და მასშტაბები ჯერჯერობით უმნიშვნელოა მთლიან საპენსიო სისტემაში. სახელმწიფო პენსიის რეგულირება ხდება საქართველოს კანონით პენსიის შესახებ. ამ კანონის მიზანია საქართველოს მოქალაქეთა სოციალურ-ეკონომიკური უფლებების რეალიზაციის უზრუნველყოფა, რომელიც საქართველოს კონსტიტუციითაა გარანტირებული.

პენსიის ადმინისტრირების კომპეტენტური ორგანოა საქართველოს შრომის, ჯანმრთელობისა და სოციალური დაცვის სამინისტროს კონტროლს დაქვემდებარებული საჯარო სამართლის იურიდიული პირი - სოციალური მომსახურების სააგენტო, რომელიც ახდენს პენსიის დანიშვნას, გაცემას, შეჩერებას, განახლებას, გადაანგარიშებასა და შეწყვეტას, აგრეთვე პენსიის მიღებასთან დაკავშირებული სხვა ურთიერთობების რეგულირებას. რადგანაც საქართველოს საპენსიო სისტემაში ძირითადი მაინც სახელმწიფო პენსიაა, საპენსიო გასაცემლები მძიმე ტვირთად აწევა ქვეყნის ისედაც მწირ ბიუჯეტს. მაგალითად, საქართველოში ყოველწლიურად გასაცემი პენსიების სიდიდე სახელმწიფო ბიუჯეტის ხარჯვითი ნაწილის დაახლოებით 13 %-ს შეადგენს. მიუხედავად მაღალი მაჩვენებლისა, რეალური პენსია საარსებო მინიმუმზე ნაკლებია. ამიტომაც, საჭიროა ქვეყანაში საპენსიო რეფორმის განხორციელება და კერძო საპენსიო სისტემის ჩამოყალიბება.

¹ <http://www.who.int/ageing/en/>

„ხანდაზმულთა სოციალური დაცვის ღონისძიებების უმთავრეს ნაწილს ხანდაზმულობის პენსია წარმოადგენს. საპენსიო ასაკის მიღწევის შემდეგ (მამაკაცებისთვის 65 წელი, ქალებისთვის 60 წელი) ყველა მოქალაქეს უფლება აქვს მიიღოს პენსია. ხანდაზმულობის პენსია 2013 წლის სექტემბერში 150 ლარამდე გაიზარდა (2010 წელს 115 ლართან შედარებით). დღეისათვის პენსიების ჯამური რაოდენობა 684 000 ადამიანს - მოსახლეობის 15%-ს შეადგენს, ხოლო საპენსიო ხარჯები - დაახლოებით 1 მილიარდ ლარს. მოსახლეობის პროგნოზი იმის გათვალისწინებით, რომ პენსიონერთა რაოდენობა მზარდია და გაეროს მონაცემებით, ასაკით პენსიონერები 2050 წლისათვის შეადგენენ საქართველოს მოსახლეობის 25%-ს, ადგილი ექნება სოციალური დანახარჯების მუდმივ ზრდას. გამომდინარე აქედან, აუცილებელია ეტაპობრივად დაგროვებით საპენსიო სისტემაზე გადასვლა, რაც, თავის მხრივ, ხელს შეუწყობს საბაზისო პენსიის არამდგრადი ზრდისგან გამომწვეული წნეხის შემსუბუქებას. ასევე მნიშვნელოვანია საბაზისო პენსიის ინფლაციასთან მიმდინარე პრინციპის შემოღება და პენსიის ზრდის ყველაზე ღარიბ პენსიონერებზე ორიენტირება, რაც დაიცავს პენსიის მსყიდველობითუნარიანობას და მოლოდინებს მისაღებ დონეზე შეინარჩუნებს“.¹

მოსახლეობის დაბერება, რაც მსოფლიოს ტენდენციაა, საქართველოშიც შეუქცევად ხასიათს ატარებს. ამდენად, საპენსიო უზრუნველყოფის მხოლოდ სახელმწიფო სექტორის გადსაწყვეტ პრობლემად დატოვება სახელმწიფო ვალდებულების მნიშვნელოვანმატებას და ფისკალური პოლიტიკის გაუარესებას გამოიწვევს.

საქართველოში ფისკალური კონსოლიდაციის პროცესის მთავარი გამომწვევა სოციალური ხარჯების ზენოლის მართვა და ამავე დროს, მოხუცებულთათვის ადეკვატური პენსიის, ხოლო სოციალურად დაუცველთათვის ადეკვატური სოციალური დახმარების უზრუნველყოფაა. პენსიები სოციალური

¹ საქართველოს სოციალურ-ეკონომიკური განვითარების სტრატეგია. საქართველო 2020. გვ. 57.

ხარჯების უმსხვილესი კატეგორიაა და მთლიანი სოციალური დაცვის ხარჯების ნახევარზე მეტს შეადგენს. ამ მაგალითის განხილვისას, ცხადი გახდა რომ ჩვენი ქვეყანა საპენსიო რეფორმას საჭიროებს. საჭიროა მოხდეს სახელმწიფო საპენსიო სისტემის რეორგანიზება და მასთან ერთად, არასახელმწიფო საპენსიო დაზღვევის განვითარება.

რაც შეეხება **კერძო საპენსიო დაზღვევას**, მისი რეგულირების საკითხებს ადგენს „არასახელმწიფო საპენსიო დაზღვევისა და უზრუნველყოფის შესახებ“ საქართველოს კანონი.

ფიზიკურ პირთა არასახელმწიფო საპენსიო დაზღვევა და უზრუნველყოფა ხორციელდება სახელმწიფო საპენსიო უზრუნველყოფისაგან დამოუკიდებლად. მათ უფლება აქვთ უზრუნველყოფილ იქნენ არასახელმწიფო პენსიებით. საქართველოში არასახელმწიფო პენსიების გაცემას სადაზღვევო კომპანიები ახორციელებენ, ანუ ხდება საპენსიო დაზღვევა. სადაზღვევო კომპანიები არასახელმწიფო საპენსიო დაზღვევასა და უზრუნველყოფას ახორციელებენ საქართველოს ეროვნული ბანკის მიერ გაცემული დაზღვევის ლიცენზიისა და რეგისტრირებული საპენსიო სქემების საფუძველზე.

არსებობს ორი მთავარი მიზეზი, რომელიც საქართველოს საპენსიო სისტემის რეფორმის აუცილებლობას განაპირობებს:

1) საქართველოს საბიუჯეტო-საფინანსო სისტემისათვის დიდ ტვირთს წარმოადგენს სახელმწიფო საპენსიო დაზღვევა; 2) ისევე, როგორც ევროპის ქვეყნებში, საქართველოშიც აქტუალურია მოსახლეობაში პენსიონერთა ხვედრითი წილის ზრდის პრობლემა. დასაქმებულთა თანაფარდობა პენსიონერებთან მიმართებაში ცოტათი თუ აღემატება ერთს(უცხოეთის განვითარებულ ქვეყნებში ეს თანაფარდობა 1/3-თან ტოლია).

სადაზღვევო კომპანია შეიძლება იყოს ერთი ან რამდენიმე საპენსიო სქემის დამფუძნებელი. მას უფლება აქვს განახორციელოს თავისი მუშაკების არასახელმწიფო საპენსიო დაზღვევა და უზრუნველყოფა როგორც დამსაქმებელ-დამფუძნებელმა.

საპენსიო სქემის დამფუძნებელ სადაზღვევო კომპანიას შეუძლია უშუალოდ მართოს საპენსიო დანაგროვის შესაბამისი

აქტივები, ამასთანავე, იგი ვალდებულია ისარგებლოს სპეციალიზებული დეპოზიტარის მომსახურებით.

კერძო საპენსიო სქემის სუბიექტები (დამფუძნებლები, აქტივების მმართველი კომპანიები და სპეციალიზებული დეპოზიტარები) ვალდებული არიან იმოქმედონ მხოლოდ მონაწილეთა ინტერესების სასარგებლოდ.

„არასახელმწიფო პენსიის სახეებს მიეკუთვნება:

- მუდმივი პენსია, რომელიც ეძლევა ფიზიკურ პირს პენსიის გაცემის დაწყების დღიდან მის გარდაცვალებამდე;
- განსაზღვრული ვადით გასაცემი პენსია, რომელიც ეძლევა ფიზიკურ პირს არანაკლებ 5 წლის განმავლობაში“.¹

ძირითადი აქცენტი კერძო საპენსიო სქემების შექმნაზე უნდა გაკეთდეს. სახელმწიფო მაქსიმალურად უნდა უწყობდეს ხელს არასახელმწიფო საპენსიო სქემებს, თუმცა, მოკლე პერიოდში სახელმწიფო პენსიაზე უარის თქმა და კერძო საპენსიო დაზღვევაზე გადასვლა შეუძლებელია. საქართველოში საპენსიო სქემების ჩამოყალიბების პროცესი ძალიან ნელი ტემპით მიმდინარეობს, რაც, ერთი მხრივ, დასაქმების დაბალი დონით და, მეორე მხრივ, სამთავრობო პოლიტიკის არაადეკვატურობით არის გამოწვეული. ისეთ ქვეყნებში, როგორიც საქართველოა, კერძო საპენსიო დაზღვევაზე გადასვლას ხელისუფლებიდან სტიმულირება სჭირდება.

სახელმწიფოს მხრიდან, ამგვარი ცვლილებების მიმართ ნების არსებობის გარდა, აუცილებელია შეიქმნას კერძო საპენსიო დაზღვევის განვითარების სტრატეგია, რომლის შედგენის პროცესში ჩართული იქნებიან სამთავრობო, საერთაშორისო და არასამთავრობო ორგანიზაციები. სტრატეგიული გეგმის გარდა, შესაბამისად უნდა მონესრიგდეს საკანონმდებლო სისტემა. დღეისათვის საქართველოს ეკონომიკის სამინისტროსთან არსებული საპენსიო რეფორმების სამსახური ახორციელებს კერძო საპენსიო სისტემის კონცეფციაზე მუშაობას, რომლის დასრულებასაც 2017 წლისათვის ვარაუდობენ. რაც შეეხება კერძო ფონდის მართვას, ეს იქნება უცხოური კერძო

1 შათირიშვილი ჯ; კაკაშვილი ნ. სადაზღვევო საქმე. თბ; 2012, გვ. 393.

კომპანია, რომელსაც მსგავსი ფონდის მართვის გამოცდილება აქვს. წესდება გარკვეული ზღვარი იმასთან დაკავშირებით, თუ ვინ მიიღებს ან ვერ მიიღებს მონაწილეობას ამ სისტემაში. სავარაუდოდ, მამაკაცებისათვის მინიმალური ასაკი იქნება 45 წელი, ქალებისათვის კი 40 წელი. ხელფასის რამდენი პროცენტის გადახდა მოუწევს დასაქმებულს თავის საპენსიო ანგარიშზე და რა სახით ჩაერევა სახელმწიფო კერძო საპენსიო ფონდის ფუნქციონირებაში, ამასთან დაკავშირებით მიმდინარეობს საკითხის დაზუსტება შესაბამის სამსახურებში.

დასკვნა

კერძო საპენსიო სისტემის განვითარებას უდიდესი ეფექტის მოტანა შეუძლია საქართველოს საფინანსო სისტემისათვის დიდი მოცულობის ფინანსური და საინვესტიციო რესურსების სახით. ეს რესურსები კი გრძელვადიანია, რადგანაც საპენსიო პროგრამები მრავალწლიანია. ამასთან, კერძო საპენსიო სისტემის რეფორმირების პროცესში უნდა მოხდეს ფასიანი ქაღალდების ბაზრის განვითარების ხელშეწყობა, რადგანაც კერძო საპენსიო ფონდები ახორციელებენ საპორტფელო ინვესტიციას და თავიანთი აქტივების ფასიან ქაღალდებში ინვესტირებას.

ლიტერატურა :

1. საქართველოს კანონი არასახელმწიფო საპენსიო დაზღვევისა და უზრუნველყოფის შესახებ“ (1998);
2. საქართველოს სოციალურ-ეკონომიკური განვითარების სტრატეგია. საქართველო 2020;
3. შათირიშვილი ჯ; კაკაშვილი ნ. სადაზღვევო საქმე. თბ; 2012;
4. ცერცვაძე ა; ხანთაძე გ; ვეკუა ა. სადაზღვევო საქმე. თბ; 2016;
5. [www. parliament. ge](http://www.parliament.ge);
6. [www. insuranse.org.ge](http://www.insuranse.org.ge);

REFERENCES:

1. The Law on Non-State Pension Provision and Insurance (1998); (in Georgian Language);
2. Social-economic Development Strategy of Georgia. Georgia 2020; (in Georgian Language);
3. Shatirishvili J., Kakashvili N., Insurance. Tbilisi, 2012; (in Georgian Language);
4. Tsertsvadze A., Khantadze G., Vekua A., Insurance. Tbilisi, 2016; (in Georgian Language);
5. [www. parliament.ge](http://www.parliament.ge);
6. [www. insuranse.org.ge](http://www.insuranse.org.ge).

PENSION SYSTEM REFORM: THE ESSENCE AND MEANING FOR GEORGIA

**Mzevinar Nozadze, Ac. Doctor of Economics,
Associate Professor of Georgian Technical University**

RESUME

One of the important places in the economic reforms and social programs, implemented by any country's government, is occupied by the reform related to the pension system. This is associated with the role that the pension system plays in the financial and social field of the country.

Generally, the pension system includes the state pension system and the non-government pension one. The basic principle for operating the state pension system is relied upon the circumstance that employed people pay taxes with this or that reform (basically in the form of income tax) the accumulation of which takes place in the state pension fund. As for the non-government pension system, the principle of accumulation is operated. During the entire employment period the participator of

pension fund makes contributions to the own pension account. The amount of pension reaching the relevant pension age is determined by the amount accumulated.

Due to the fact that now the basic is the state pension system of Georgia, the pension issuances are laid on the poor budget of the country as a heavy burden. For instance, the capacity of annually issuable pensions in Georgia occupies at about 13% of expenditure part of the state budget. Despite of the high figures, the real pension is less than the minimum for existence. That's why it is necessary to implement the pension reform in the country and to establish the private pension system.

Keywords: Pension; Insurance; Amount; Pension Provision; Pension System; Pension Fund; Economic Reforms; Social Programs; Social Service; State Pension.